



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

xxvi La vie de s. Zepherin, Pape & mart.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

ple de la pureté, vous reprimez les lascifs, & apprenez aux vns par vostre conuersation, ce qu'ils doivent imiter, & aux autres ce qu'ils deuoient fuir: c'est en vous que les belles paroles ont esté secondees de genereuses actions.

La vie de saint Cefaree a esté escripte par Cyprian son disciple, & dediee à sa sœur Cefaree, telle qu'elle est au 4. Tome de Surius, mais d'autant qu'elle n'y est pas toute entiere, l'on ignore l'an & le iour de son decez. Le martyrologe Romain, ceux de Beda, Vsuard, & Adon en font mention le 27. d'Aoust.

D'aucuns se sont mespris au temps qu'il a vesceu, Vincent de Beauuais dit, qu'il florissoit l'an sept cens, Triteme six cens, ce qui ne peut estre, suivant ceste remarque qu'en fait Baronius en ses Annotations sur le Martyrologe, & au 6. Tome en ses Annales: car saint Cefaree vint à Rome du temps du Pape Simache, qui entra au siege l'an 498. de maniere qu'il se trouue bien plus ancien que ne disent ces Auteurs: cela se peut prouuer par plusieurs autres argumens, entre autres des Conciles esquels il se trouua, & les confirma comme Archeuesque d'Arles & Metropolitain. Saint Cefaree escriuit des liures fort vtils, dont parle Triteme, desquels il ne se trouue plus que certaines Homelies, qu'il prescha en diuers temps. S. Gregoire de Tours en parle en son Histoire de France, liure 9. ch. 40. & 41. Fortunat en plusieurs endroits, Grenade des Hommes illustres chap. 86. Est à remarquer qu'il y a eu vn autre Cefaree qui a escript la vie de saint Engelbert rapportee par Surius en son 9. Tome le septiesme de Novembre, qui estoit vn Allemand, Religieux de Cisteaux en la vallee de Pierre, ou Histerpasse, & l'on croit qu'il est l'Auteur du liure intitulé le Miroir des exemples, qui florissoit en l'an 1250.

LA VIE DE SAINT Zepherin, Pape & Martyr.

Saint Zepherin Pape & Martyr estoit natif de Rome, fils d'Abonde, & succeda à saint Victor, aussi Pape & Martyr: c'estoit vn saint homme, de bonnes mœurs, tres-dignes du saint Siege, fort attentif à tout ce qui dépendoit de sa charge Papale; soit pour conuaincre les heretiques, & arracher la zizanie que l'ennemy auoit semée, soit pour l'honneur & reuerence qu'on doit à Dieu, & à tout ce qui peut seruir à l'ornement & augmentation de son Eglise. De là vient que comme en cét heureux temps, la pauureté de l'Eglise estoit cause qu'on y voit au saint sacrifice de la Messe de calices & platines de bois, le Pape Zepherin defendit de ne plus consacrer en des calices de bois, ains de verre: encore que depuis il fut determiné en plusieurs Conciles, qu'on ne se seruiroit point de calices de verre, de peur de les casser, ains d'or, d'argent, ou à tout le moins d'estain. Il ordonna aussi que tous

les Chrestiens communieroient le saint iour de Pasques, & qu'aucun Euesque ne peut estre condamné sinon par le Pape, ou par son autorité; & que les Prestres & Diacres se trouuassent presens quand l'Euesque celebreroit, ainsi que le Pape Enariste l'auoit commandé. Que les Prestres & Diacres fussent faits publiquement deuant les clercs & les laiz, afin que son innocence fust manifestee, & qu'on fist choix en telles charges de personnes doctes & irreprehensibles. Il ordonna plusieurs autres choses tres-sainctes & vtils. Apres auoir tenu quatre fois les Ordres au mois de Decembre, & sacré 13 Euesques, 13 Prestres & 7 Diacres, apres auoir demeuré dans le siege Apostolique 18. ans & 18. iours (encore que d'aucuns ne luy en donnent pas tant, neantmoins c'est le plus certain, selon Eusebe & Baronius) il fut martyrisé le 29. d'Aoust, l'an de nostre Seigneur 221. sous l'Empire d'Antonin Heliogabale. Son corps fut enterré dans vn cimetiere qui estoit à luy aupres du cimetiere de Calixte.

A Rome, saint Zephyrin Pape & martyr, successeur de saint Victor, apres auoir beaucoup enduré pour la Foy de nostre Sauueur, recut la couronne du martyr. En la mesme ville les saints martyrs Irenee & Abondie, pour auoir tiré d'un cloaque le corps de sainte Concorde, durant la persecution de Valerian, furent precipitez dans le mesme cloaque où ils moururent. Leurs corps en furent depuis retirez par Iustin Prestre, & enseuelis en vne grotte pres saint Laurens. A Vinti milia ville pres de Genes, se fait la feste de saint Second martyr, personnage fort renommé, qui fut vn des Capitaines de la legion des Thebes. A Bergamo ville de Lombardie, saint Alexandre soldat de la mesme legion, eut la teste tranchée pour la confession de la Foy. A Comidia S. Adrian fils de l'Empereur probe, reprochant à l'Empereur Licinia la persecution qu'il auoit esmeu contre les Chrestiens, fut massacré par le commandement du mesme Empereur. Son corps fut enseueli à Argyropoli par ordonnance de Domice Archeuesque de Constantinople qui estoit son oncle. A Itaque ville d'Espagne S. Geronce Euesque & martyr, y ayant presché l'Euangile du temps des Apostres, fut mis en prison où il mourut. Item, en Espagne deceda S. Victor martyr, massacré par les Mores. A Pistoie ville de Toscane saint Felix Prestre & Confesseur.

A Capouë en la Champagne d'Italie deceda S. Rufe ou Reus Euesque, martyr, & gentil-homme de race, lequel fut avec toute sa maison, baptisé par S. Apollinaire, disciple de S. Pierre. A Tomes ville du Pont en Asie, trespasserent les saints martyrs Marcellin Colonel, Manee sa femme, & Jean, Serapion & Pierre leurs enfans. A Saierne les saints martyrs Fortunat, Caye & Anthes, lesquels ayant beaucoup enduré sous l'Empereur Diocletian, & le Proconsul Leonce, passerent en fin par le fil de l'Espée. A Cordouë en Espagne endurerent les saints Gregoire Diacre, Aurele, Felix, Natalie, & Liliose. En Sicile sainte Euthalia vierge massacrée par son propre frere. A mesme iour sainte Anthuse la plus ieune fut precipitée dans vn puits, où elle accomplit son martyre. A Arles en Prouence mourut S. Cesar Euesque, personnage de grande sainteté & deuotion. A Bergamo S. Name, lequel ayant esté baptisé par S. Barnabé, fut par le mesme, sacré premier Euesque de ladite ville. A Auzun deceda S. Syagre Euesque & Conf. A Pavia S. Iean Euesq. & Conf. En la Thebayde S. Damon Anachoret.

LA VIE DE SAINT AVGVSTIN, Euesque & Docteur de l'Eglise.

A vie de l'admirable Docteur & lumiere de l'Eglise S. Augustin, a esté escripte par Possidone Euesque de Calamése, qui demeura 40 ans avec luy, & par le mesme saint en ses Confess. qui commence à louer Iesus Christ du temps qu'il estoit encore au ventre de sa mere; dépeignant sa ieunesse, & le discours de sa vie, iusqu'au de-